



11. september 2020

UKA 2020/143

Inatsisartut ingerlatsinermut maleruagassaani § 36 malillugu apeqquteqaat aallaavigalugu oqallisissatut siunnersuutigaarput:

Apeqquteqaat aallaavigalugu oqallisissatut siunnersuutigaarput, qanoq ililluta pisortat suliffeqarfiini perorsaanermik aamma/imaluunniit inunnik isumagininnermik suliaqartut inunnik sullissinnermini uippakajaarnissaraluat aammalu nukissaarunnissaraluat pinaveersaartitsinnaaneripput.

(Demokraatit Inatsisartuni gruppiat)

Isertuunneqarsinnaangilaq, nappaatit uippakajaarneq nukissaarunnerlu annertusingaluttuinnarmata. Tamanna atuuppoq pingaartumik, inunnik sullissisunut. Danmarkimi misissuinerup takutippaa, pisortani sulisut akornanni uippakajaarnermik atugaqartut 20 procentimik qaffariarsimasut 2012-imiit 2016-imut. Perorsaasunut tunngatillugu piffissami tassani 50 procentingajammik¹ qaffariarsimallutik.

Demokraatit pissutissaqangillat isumaqassallutik, maani nunatsinni allaanerusoq.

Nukissaarunnermut tunngatillugu, amerlanerpaat isumaqartarput, nukissaarunneq amerlanerpaatigut sulisut akornanni, inunnik ikiortarialinnik sullissisuni pinngortartoq². Allatut oqaatigalugu perorsaasut inunnillu sullissisut aamma ilinniarsimangitsut taakkunani sulisut napparsimalernissaminnut ulorianartorsiorput. Tassanilu aamma Demokraatit isumaqangillat, tunngavissaqartoq ilimagissallugu, maani nunatsinni allaanerusoq.

Maani Nunatsinni taakku saniatigut ajornartorsiutaavortaaq, perorsaasunik inunnillu sullissisunik ilinniarsimasunik³ amigateqaratta, taamaattumillu sulisut suleruloreersut qaavatigut nanertusersorneqartarlutik. Aammalu imaalluni, Danmarkimiit maani annertunerujussuarmik ilinniarsimangitsut, perorsaanermik inunnillu sullitassanik annertuumik ajornartorsiuteqartunik sullisisuullutik. Ataatsimut isigalugu imaappoq, perorsaasut inunnillu sullissisut aammalu ilinniagaqarsimangitsut, tamakkunani sulisut, maani Nunatsinni uippakajaarnermik imaluunniit nukissaarunnermik atugaqalernissaminnut qaninnerusut.

Ajornartorsiut taanna allatut ajornartumik politikkip tungaaniit ilumooruttariaqarparput. Eqimattanut taakkununga pitsaasumik suliffimmi atugaqartitsinissarput suliniutigisariaqarparput. Suliffimmi isumannaallisaanikkut pissutsit, uippakajaarnermik nukissaarunnermillu pinaveersaartitsisinnaasut.

Demokraatit isumaqarput, annikittunik pisariitsunillu iliuuseqarnikkut suliaq tanna aallartilluarsinnaagipput.

Immaqa sulisunut tamanut, inunnik sullitaqartunut, oqaloqatiginninnermut periutsinik

¹ <https://bupl.dk/artikel/analyse-paedagoger-oplever-stoerst-stigning-i-stress/>

² <https://www.arbejdsmiljoweb.dk/trivsel/stress/om-stress/udbraendthed>

³ <https://knr.gl/da/nyheder/mangel-p%C3%A5-p%C3%A6dagoger-er-kritisk-og-utrygt>



pikkorissartitsinissanik neqerooruteqarsinnaavugut, ataasiakkaat akisussaaffimmik tigusinissaminnut ilinniarniassammata suleqatigiillu akornanni ingerlanerliorneq unitsillugu.

Immaqa aamma sulianut ilinniartitsineq - ineriartortitsineq (supervision) neqeroorutigisinnaavarput?

Immaqa inuttut ineriartornermut pikkorissartitsineq, ataasiakkaat namminneq iliuutsiminnut akisussaaffeqalernissaannut ilinniutitut ammalu ajornartorsiutiminnik iperaasinnaaneranik ilinniartillugit, ajornartorsiuteqarsimagaannimi ingerlanerliorneq ingerlaannartussaammat?

Oqaloqatiginninnermut periutsit, sulianut ilinniartitsineq – ineriartortitsineq (supervision aamma inuttut ineriartornerup ukkatarinera Demokraatit paasinnittaasiat malillugu sulisut nukittunerulersissammatigit siunissamilu pitsaasorujussuarmik sunniuteqassalluni. Perorsaasumut aamma inunnik sullissisumuinnaanngitsoq, inuiaqatigiinnulli tamarmiusunut. Allatut oqaatigalugu suliniuteqarneq annertunngittunnguaq ukkatarineqartorli innuttaasunut tamanut inuuniarnikkut pitsaasumik kinguneqarsinnaavoq.

Taamatut oqaaseqarluta pissuserissaartumik kinguneqartussamillu oqallinnissarput kissaatigaarput.